

आकाशवाणी

खास-खास खबरां:-

- रूस दे राष्ट्रपति व्लादिमीर पुतिन होर 2 दिन दी भारत यात्रा पर अज्ज नमीं दिल्ली पुज्जा करदा ना।
- रक्षामंत्री राजनाथ सिंह ते रूसी रक्षामंत्री “भारत-रूस रक्षा आयोग” दी बैठक दी सांझे तौरा पर अध्यक्षता करगंन।
- भारत गी 2026 बरे लेई अंतराष्ट्रीय अंतर सरकारी लोकतंत्र ते निर्वाचन सहायता संस्थान दा अध्यक्ष चुनेया गया ऐ।
- बाल विवाह मुक्त भारत लेई 100 दिने दा जागरुकता अभियान अज्जै थमां शुरु होआ रदा ऐ।
- पूर्वोत्तर क्षेत्र विकास मंत्री ज्योतिरादित्य सिंधिया होरें नमीं दिल्ली च उज्जी सतह दे कार्जबल दी दुई बैठक दी अध्यक्षता कीती।
- दक्खन-अफ्रीका नै भारत गी 4 विकटें कन्नै रहाइयै श्रखला च 1-1 दी बरोबरी हासल करी लैती ऐ।

<><><><><><>

Putin –India Visit

रूस दे राष्ट्रपति व्लादिमीर पुतिन 23मीं भारत-रूस सालाना शिखर बैठक आस्तै भारत दी सरकारी यात्रा पर आवा रदे ना। 2-दिन दी इस यात्रा दौरान राष्ट्रपति पुतिन नमीं दिल्ली च प्रधानमंत्री नरेन्द्र मोदी हुंदे कन्नै गल्लबात करगंन। दवै नेता आपसी हितें दे क्षेत्रीय ते वैश्विक मुद्दें पर विचार-विमर्श करगंन। बपार- अर्थ-बवस्था- सेहत सेवा- शिक्षा- संस्कृति ते मीडिया दे क्षेत्रें सनें केई सारे समझौतें पर दस्तख्त होने दी मेद ऐ।

<><><><><><>

Rajnath –Russian DM

रक्षामंत्री राजनाथ सिंह ते रूस दे रक्षामंत्री Andrei Belousov अज्ज नमीं दिल्ली च फौज ते फौजी तकनीक सहयोग पर 22मीं भारत-रूस अंतर सरकारी आयोग दी मंत्री सतह दी बैठक दी सांझे तौर पर अध्यक्षता करगंन। रक्षा मंत्रालय नै जानकारी दिती ऐ जे दवै लीडर बैठक दौरान रक्षा दे क्षेत्र च भारत ते रूस बश्कार बहुपक्खी सरबंधें दी समूलची ते व्यापक समीक्षा करगंन।

ओ आपसी हिते दे मजूदा- क्षेत्री ते कुल संसारिक मुद्दें पर बी विचार बटांदरा करगंन। मंत्रालय नै आखेया ऐ जे इस यात्रा दे दौरान श्री Belousov राश्ट्रीय युद्ध स्मारक पर पुष्पांजलि भेंट करगंन ते देसै लेई अपनी जिंदू दा बलिदान देने आहले भारतीय सैनिकें गी शरदांजलि बी भेंट करगंन।

<><><><><><>

CEC -IDEA

भारत गी 2026 बरे लेई अंतराश्ट्रीय अंतर सरकारी लोकतंत्र ते निर्वाचन सहायता संस्थान आई.डी.इ.ए. दा अध्यक्ष चुनेया गया ऐ। एह अंतर सरकारी संगठन पूरी दुनिया च लोकतंत्र दी स्थापना ते ब्हाली दा समर्थन करदा ते सहयोग दिंदा ऐ। कल स्वीडन ते स्टॉकहोम च मिम्बर मुल्खें दी परिषद दी बैठक दे बाद एह घोषणा कीती गई जे संस्थान दा अगला अध्यक्ष भारत होग ते मजूदा अध्यक्ष स्विटजरलैंड दी थाहर लैग। भारत 2017 थमां गै अंतर सरकारी लोकतंत्र ते निर्वाचन संस्थान दा मिम्बर ऐ। अध्यक्ष दे रुप च चुने जाने पर उसी संगठन दी रुपरेखा- प्राथमिकताएं ते मिम्बर मुल्खें कन्नै साथ-सहयोग बधाने सरबंधि कम्म तय करने दा मौका थ्होग।

<><><><><><>

PM-Natural Farmina

प्रधानमंत्री नरेंद्र मोदी होरें कुदरती तरीके कन्नै राई-बाई करने दे महत्व गी उजागर करदे होई आखेआ ऐ कि एहदे नै फसलें दी बन-सबन्नता गी बढावा थ्होंदा ऐ ते रूख-बूहटें ते माल-मवेशिणं दे सांझे अस्तित्व कन्नै कुदरती ते जींदा बन-सबन्नता गी मजबूती हासल होंदी ऐ। सोशल मीडिया पर इक आलेख गी सांझा करदे होइ, मोदी होरें देश भरै दे लोकें अगगे आह्वान कीता जे कुदरती ते देसी तरीकें कन्नै राई-बाई दे ढंग-सरिस्ते गी अपनाइयै अगड़े बधन। उनें आखेआ कि प्रकृतिक खेती दी बुनियाद ते भारत दी सदिणं थमां चलदी आवा' रदी ज्ञान प्रणाली ते सिद्धांतें पर आधारित ऐ जेदे नै विजन रसैनी हैलें ते विजन सिंथेटिक खादें दे फसलां उगाइयां जाई सकदियां ना। उनें आखेआ जे भारत दा देसी तरीके कन्नै राई-बाई करने दा नजरिया बाहरली चीजें पर निर्भर रौहने दे बजाय जैविक रैंद-खेंद गी परतियै बरतने ते मिट्टी दे नरोपन गी बनाई रखने पर निर्भर करदा ऐ।

<><><><><><>

Sanchar Sathi Scindia

केंद्री संचार मंत्री ज्योतिरादित्य सिंधिया होरें बरोधी धडें दे जसूसी दे आरापें गी सिरे थमां खारज करदे होई आखेआ ऐ कि संचार साथी ऐप कन्नै ना ते जसूसी दी कोई गुंजेश ऐ ते ना गै एहदे राएं ऐसा किश कीता जाहगा। अज्ज लोकसभा च इक सोआलै दा परता दिंदे होई सिंधिया होरें साफ कीता जे उपभोक्ता अपनी सहूलत दे मताबक पंजीकरण कराइयै इस ऐप गी सक्रिय करी सकदे न ते एहदा फैयदा ठोआई सकदे न ते जिसलै चाहन इसी हटाई या डलीट बी करी सकदे ना। उनें आखेआ कि नरेंद्र मोदी सरकार नै अपने देशवासिएं गी धोखाधडी शा बचाने लेई एह सुविधा प्रदान कीती ऐ। उनें गलाया जे लोक इस ऐप गी बडा मता पसिंद करा करदे ना। उनें आखेआ जे संचार साथी ऐप ते पार्टल दौनें सरूपें च उपलब्ध ऐ ते एहदी विनाह पर गै डेढ करोड फर्जी मोबाइल कनेक्शन अजें तोडी कट्टे जाई चुके न जिसलै जे 26 लक्ख कोला मते चोरी होए दे फोन एहदी मदद कन्नै बरामद बी कीते गे ना।



Child Marriage

महिला ते बाल विकास मंत्रालय बाल विवाह आहली माडी कुबैत कोला मुक्त भारत बनाने लेई 100 दिने दे इक व्यापक जागरुकता अभियान दी अज्जै थमां औपचारिक शुरुआत करा करदा ऐ। केन्द्री महिला ते बाल विकास मंत्री अन्नापूर्णा देवी ते राज्यमंत्री सावित्री ठाकुर हुंदी मजूदगी च इस कार्यक्रम दा आयोजन अज्ज विज्ञान भवन च होग। भारत गी घट्ट उम्मी दे किशोर-किशोरियें दे ब्हाय आहले माडे चलन कोला मुक्त बनाने दे लक्ष आहली इस पैहल दा इक बरा पूरा होने दे सिलसिले च एह अभियान शुरु कीता गेदा ऐ। बाल विवाह मुक्त भारत अभियान पिच्छले बरे 27 नवम्बर गी शुरु होआ हा। 8 मार्च 2026 तगर चलने आहले इस अभियान दा उद्देश्य बाल विवाह दे खलाफ राश्ट्रव्यापी आंदोलन गी मजबूत करने लेई नागरिकें- संस्थाएं ते समुदायिक लीडरें गी इक्क-जुट करना ऐ।



SCindia-DoNER

पूर्वोत्तर राज्य दे विकास सरबंधी मंत्री ज्योतिरादित्य सिंधिया होरें कल नमीं दिल्ली च लॉजिस्टिक बुनियादी ढांचे ते संचार सम्पर्क दे बारे च उच्चि सतह दी टास्क फोर्स दी दुई बैठक च हिस्सा लैता। एहदा सरिस्ता त्रिपुरा दे मुखमंत्री माणिक साहा होरें कीते दा हा। बैठका च सिडक- रेलवे- जलमार्ग- ऊर्जा ते डिजिटल नैटवर्क सनें पूरे च मल्टीमॉडल कनेक्टिविटी गी तेज करने दे कन्नो-कन्नो दक्खन पूर्व एशिया लेई पूर्वोत्तर गी इक रणनीतिक दाखली रस्ते गी खोलने बारे बी सोच-विचार कीता गया।

पूर्वोत्तर क्षेत्र विकास मंत्रालय नै इक ब्यान च आखेया जे टास्क फोर्स नै बपार गलियारें गी मजबूत करने- बन्ने कन्नै लग्गदे इलाकें च बुनियादी ढांचे गी बधाने- इलाके लेई एकीकृत मैक्रो ग्रिड बनाने सने होर केंई मदुदे पर बी सोच-विचार कीता गया।

<><><><><><>

Govt. Mezoriam

सरकारै 15में माली आयोग दे तैहत माली बरे 2025-26 आस्तै मिजोरम दे ग्रामीण मुकामी निकाएं गी 15 करोड़ रपे थवां मती दी पैहली किश्त जारी करी दिती ऐ। राज्य दे स्वायत्त जिला परिषद क्षेत्रें सने सारे पात्र ग्राम परिषद इस रकम दा इस्तेमाल करी सकंगन। ग्रामीण मुकामी निकाए आस्सेया तनखाह ते होर दुए सरबन्धी कम्में दी लागत गी छोडियै जरुरतै आस्तै इसदा इस्तेमाल कीता जाग।

<><><><><><>

Op Sagar Bandhu

आप्रेशन सागर बंधू दे तैहत भारत नै श्रीलंका च चक्रवात प्रभावत लोकें दी सहायता लेई बड़ी मती गिनतरी च राहत ते सहायता समेयान पुजाया ऐ। वायसेना दे जहाजै राएं उत्थे दूर-दरेडे ते प्रभावत इलाकें जित्थे सिडक सम्पर्क त्रुट्टी गोदा ऐ- लेई इक बना- बनाया बैल्ले ब्रिज भेजया ऐ- जिसी तुरत सिडकै दे नुक्सान पुज्जे दे हिस्से पर लाइयै गड्डियें ते लोकें दी आओ-जाई ब्हाल कीती जाई सकदी ऐ। इस पुल दी मदद कन्नै प्रभावत लोकें तगर दोआइयां-पानी- खाने-पीने दा समेयान- कम्बल- कपडे- टैंट ते रोजमर्रा दे इस्तेमाल आहलियां होर दुइयां चीजां पुजाने च बी सखाल होग। बैल्ले पुल दी मदद कन्नै राहत ते बचा कर्मियें गी बी प्रभावत इलाके तोड़ी पुज्जने च सखाल होग। श्रीलंका च चक्रवाती तूफान दित्वाह नै बड़ी मती तबाही मचाई ऐ- जेहदे कारण कोई 4 सौ लोकें दी मौत होई चुकी दी ऐ ते लक्खां बद्दे बेघर होई गेदे न। भारत उप्परोतली राहत ते मनुक्खी सहायता अपने इस गोआंडी गी पुजा करदा ऐ। भारतीय ब्हाई फौज दी सी-17 ट्रांसपोर्ट विमान मॉडयूलर फील्ड अस्पताल- 70 कोला मते डाक्टरें ते नीम डाक्टरी अमला ते गड्डियां लेइयै कोलम्बो पुज्जी गोदा ऐ। विदेश मंत्रालय नै दस्सेया ऐ जे तूफान प्रभावत श्रीलंका दी मदद लेई भारत नै 28 नवम्बर थमां गै आप्रेशन सागर बंधु शुरु कीते दा ऐ।

<><><><><><>

Cricket

ते हून क्रिकेट रायपुर दे शहीद वीर नारायण सिंह अंतराष्ट्री स्टेडियम च मजूदा श्रंखला दे दुए मुकाबले च दक्खन-अफ्रीका नै भारत गी 4 विकट कन्नै रहाइयै श्रंखला च 1-1 दी बरोबरी करी लैती ऐ। कोहली दे 53में ते गायकवाड़ दे पैहले इक-रोजा मैच दे शत दे बूते पर भारत नै पैहले बल्लेबाजी करदे होई 358 रन्ज बनाए जेहदे परते च दक्खन अफ्रीका दी टीम नै 4 गेदां बाकी रौंदे जित्त दा लक्ष हासल करी लैता। भारत कोला थ्होए दे 359 रन्ज दे लक्ष दा पिच्छा करदे होई दक्खन-अफ्रीका दी शुरुआत दना खराब रेही ते छड़े 26 रन्ज दे स्कोर पर ओहदी पैहली विकट चली गई पर मगरा मारक्रम ते बावुया नै दुए विकट लेई 101 रन्ज दी सांझेदारी करियै- जित्त लेई निग्गर बुनियाद त्यार करी लैती। दक्खन –अफ्रीका लेई मारक्रम नै सब्बनें शा मते 110 रन्ज बनाए जिसले कि ब्रिज़कें नै 68- ब्रेविस नै 54 ते बावुम नै 46 रन्ज दा योगदान दिता।

<><><><><><>